

東  
華  
續  
錄

東華續錄

同治五十一

臣王先謙敬編

臣張式恭恭校

九月癸亥朔諭軍機大臣等總理各國事務衙門奏連日與俄國公使籌商匯兌伊犁餉銀辦理情形一摺軍營用項以糧食火藥等項爲大宗該國既不能多匯見銀如肯賒借各項卽與匯兌餉銀無異惟伊城被圍日久恐乏員迎提必須由俄國派人送至伊城方免疏虞至將來償還價值及酬勞等款較之匯兌餉銀或無糜費惟見在軍情緊急不得不從權辦理且俄國不肯發兵若能多派弁兵護解糧食火藥等款到城亦可借助聲威卽著明緒按照該衙門籌議各節迅速行文俄國邊界各官詳細籌商相機辦理該國接到該公使公文如果照辦其賒借各款應如何酌議

價值及日後如何分別歸還並護解人等到伊應如何酬勞駕馭之處並著該將軍隨時斟酌情形妥爲辦理總理各國事務衙門摺一件並照錄與俄使倭良嘎里來往信函各一件均著鈔給閱看將此由六百里諭令知之○盛京將軍恩台奏見飭統領豐恩帶兵追剿賊匪得旨俟豐恩等將追賊實在情形呈報到日卽行具奏仍一面嚴飭實力追捕毋稍鬆懈○甲子諭內閣昨因御史汪朝榮奏參聯捷片內有聯捷奉旨發往原任陝甘總督熙麟差遣委用之語何時有此諭旨令汪朝榮明白回奏茲據奏稱聯捷並無發交熙麟差委之旨委係具摺時繕寫錯誤迨經查出因係參劾之件不敢奏請更正疏忽難辭等語諭旨係宣示中外之件該御史何得憑空臆撰任意書寫實屬荒謬非尋常錯誤可比汪朝榮著交部議處○諭軍機大臣等前因馬賊擾及薊州一帶諭

令劉長佑傳知調任山西太原鎮總兵蔣臨照暫緩起程見在近畿地面尙屬安謐而山西防務最關緊要著劉長佑迅卽傳諭蔣臨照速赴太原鎮本任以重職守劉長佑見赴邊牆查勘隘口著卽查照文祥所奏邊隘等處布置情形及歷次寄諭悉心籌畫務令官兵民團聯絡聲勢俾賊匪無間可乘以靖地方劉祺劉景芳所帶之馬勇著劉長佑調赴玉田以西御道以南駐紮該督此次帶往之馬步各隊著在通州三河以西御道以南駐紮並嚴飭各員弁周密巡防肅清蹕路該督於查勘邊隘及橋道事畢仍著於啟鑾前二三日來京伺候召見將此由四百里諭令知之○諭德興阿劉蓉奏甘省軍情猝變陝西局勢可虞請撥兵餉嚴備並雷正綰爲回酋蠱惑各摺片雷正綰戰功素著受恩不爲不深乃以金積堡一敗不支又平日嗜好太重致爲回酋赫明堂所制或係

部下驕兵悍卒迫脅至此亦未可知劉蓉已選派向與該提督熟識之員持函往諭開示利害如果能遽行悔悟是該提督尙有受恩之日著楊岳斌德興阿劉蓉卽行傳知該提督令其約束將弁其相奮勉但能顯立功效仍必立沛恩施如果縱令所部騷擾地方不能禁止將來身名俱裂悔之何及如此確切開示看其如何轉關再行相機辦理至平涼慶陽涇州長武等處楊岳斌德興阿劉蓉務當妥籌保護毋任蔓延爲患此後軍情著卽隨時飛速奏聞以慰馳念將此由六百里各諭令知之○諭德興阿劉蓉奏甘省軍情猝變陝西局勢可虞一摺阿茂林雷正綰張華等營先後變亂潰卒勾結逆回紛竄陝境圍攻涇州各路同時喫緊腹地空虛岌岌可慮著都興阿穆圖善迅撥金順西蒙克西克兩起馬隊馳赴陝省之邠長一帶相機扼堵並著崇實駱秉章於周達武部

下抽撥總兵李輝武所帶步隊五營隨趙長齡由川迅速赴陝以  
護省垣而資調撥其口糧卽由川省源源解濟毋令缺乏趙長齡  
疊經有旨催赴新任諒必迅速起程到陝後著與德興阿劉蓉會  
商防剿事宜彼時劉蓉應俟邊防稍鬆再行回籍見在甘省情形  
楊岳斌知之必悉雷正綰見在何處各潰勇能否設法羈縻俾令  
剿賊自效平涼慶陽有無警報能否撥兵救援並著該督妥籌辦  
法迅速奏聞以慰馳繫此股潰勇勾結回逆勢甚猖獗難保不乘  
閒紛竄王榕吉未可以賊蹤尙遠稍涉大意其交界應防處所著  
早爲布置免致臨渴掘井貽誤地方蔣臨照如已行抵山西卽令  
馳赴太原鎮總兵新任籌辦防務毋稍延誤劉蓉另片奏穆圖善  
營餉久缺請再飭川督會同新任陝撫趙長齡將毛震壽前在川  
省籌捐款項三十萬之數源源解濟等語所奏自係實情目前甘

省軍情緊急更甚於前崇實駱秉章等務當力爲其難仍飭令藩司會同毛震壽將原籌捐款催齊陸續解甘以支危局趙長齡已簡陝撫於甘省餉需誼應兼顧著與崇實駱秉章悉心籌畫崇實駱秉章等尤當於民間剴切曉諭務使民生軍餉兩無所妨方爲至善山西應解陝省軍餉並著王榕吉無論何項先行撥解若干以濟急需毋得稍有遲延致誤戎機將此由六百里諭知都興阿穆圖善崇實駱秉章楊岳斌德興阿趙長齡劉蓉並傳諭王榕吉知之○諭瑞麟等奏花旗匪黨乞降收復長樂縣城見飭規復鎮平官軍赴西省會剿攻克木式匪巢調曾敏行移紮南雄各摺片花旗股匪闖入長樂後經總兵卓興等設法圍攻該匪自知窮蹙僞列王黃宗保遣人赴鄭紹忠營籲請投誠於七月二十七日黃宗保率夥二百餘人從南門奔出薙髮繳械僞天將林振揚亦率

同許明升等縋城乞降將首先倡亂之僞來王陸順得捆縛送出並般來逆親黨百餘名逆眾全行薙髮當將縣城收復卓興等見於降人中酌選精銳率領同赴鎮平勦辦濂逆著瑞麟郭嵩勛卓興等嚴密防維妥爲駕馭不可稍涉大意致爲該降人所紿又生反側汪海洋屯踞鎮平兇燄日衰見在長樂縣城克復卓興鄭紹忠等軍已卽日移紮鎮平是鎮平之西南面已有粵軍兜圍著左宗棠檄飭閩粵江西各軍協力進攻務將汪逆一股迅速殄除瑞麟等見調回岑溪之曾敏行一軍駐紮南雄派朱國雄等兩營移赴連和一帶卽著飭令該員等扼要嚴防毋令逆匪蔓延及江境劉坤一孫長綬卽飭席寶田婁雲慶等懍遵前旨迅速前進聽候左宗棠調遣曾敏行一軍見已調回粵東其岑溪等處餘匪著張凱嵩飭令蔣澤春會同地方文武實力搜捕毋畱餘孽將此由六



百里諭知左宗棠瑞麟徐宗幹劉坤一張凱嵩郭嵩燾並傳諭孫長紱知之○以試辦河運著有成效予吳棠議敘○丙寅以文宗顯皇帝 孝德顯皇后梓宮奉安 山陵諭免經過地方本年額賦○丁卯諭內閣劉蓉奏發遣官犯呈請贖罪一摺據稱已革左副都御史王履謙已革前署浙江杭嘉湖道劉齊昂已革從九品銜井維憲均係發遣新疆官犯按照新疆贖罪章程捐銀贖罪請旨定奪等語王履謙前在浙江本籍辦團諸多貽誤迨紹興府城失陷該革員復蒼黃遠遁誘罪於人至劉齊昂係因浙江省城失守獲咎井維憲在陝西商南有攤銀餽賊情事該革員等從前所犯之罪情節較重所請捐銀贖罪之處著不准行卽著劉蓉迅將該革員等押赴新疆戍所不許逗畱○曾國藩奏捻逆竄擾潁州劉銘傳派劉盛藻等馳抵沈邱與豫軍蔣希夷皖軍康錦文等

會同進剿八月十二日偪進凹張賊寨該逆馬步萬 迎拒唐殿

魁劉盛藻左右夾擊斃賊三百餘名蔣希夷等繼進與張景春等  
兩路包鈔賊匪奔潰我軍追至洪河南岸瓦店等處擒斬甚夥攻  
破賊寨二十餘座賊向西南狂竄十四日又折回洪河之北洋埠  
連日竄至項城西境之南頓集距周家口五十里劉銘傳督軍由  
項城間道馳抵南頓飭各營馬步隊三路並進賊勢披靡我軍疾  
追十餘里斃匪千餘名生擒三百餘名賊乘夜越周家口徑渡沙  
河由西華竄入太康復奔向睢州劉銘傳追至睢州賊已先發乃  
暫棄步軍獨督馬隊馳三十餘里及之賊四散狂奔竄至考城之  
保庶寨曹境之魏灣集盤踞定陶境內據擒賊供稱此次東竄之  
匪係任柱爲主而賴汶洸牛洛紅亦在其中圖入青石關擄掠臣  
查羣賊以任柱爲最悍賴汶洸爲最詭如果二酋回竄則賊勢已

趨重東路而青石關通登萊青三府尤爲山東膏腴之地不可不  
速籌援剿已飭潘鼎新一軍扼守運河又調張樹珊色爾固善等  
率徐州全軍馳赴山東協剿又調臨淮六千人以四千接防徐州  
以二千續往山東聽調周盛波一軍移紮歸德以遏東賊回竄之  
路雷劉銘傳一軍仍駐周家口以扼陳汝最要之區惜無大枝馬  
隊可以縱橫追逐僅就見有兵力東顧齊省西顧豫省中間兼顧  
徐州臨淮兩處期於首尾相應頃奉諭旨飭臣進駐許州並籌遊  
擊之師臣本擬四路駐兵之外更添大枝遊擊之師惟遊兵須以  
馬隊爲主今臣處馬隊不滿二千其新調募之察哈爾馬兵西淮  
馬勇爲數無多不堪向敵臣日夜焦思破寇無術至賊勢趨重山  
東自當先剿東路不必遽赴許州伏乞訓示遵行上諭軍機大  
臣等閫敬銘奏賴汝沆等股匪竄入東境經楊飛熊王心安等軍

隨地截剿該逆由曹州向西北駛竄見俱聚於荷澤東明兩縣境  
間敬銘飭楊飛熊等兩軍穩紮曹縣荷澤兩處察看賊勢以爲動  
靜並令潘鼎新督率淮勇六營馳赴鉅野兼顧鄆城餘營仍畱濟  
甯以顧南路運河布置尙爲周密惟河水見在淺涸賊蹤飄忽異  
常務當加意嚴防不可稍形鬆懈黃河水勢日消尤當飭令管帶  
礮船之都司楊長林會同直隸礮船嚴布濮范水套梭織巡邏以  
防偷渡並著飭令衛榮光等嚴督防河各勇聯絡民團妥爲布置  
其省城防務卽著飭令丁寶楨督辦至青州一帶爲東省膏腴腹  
地卽著閻敬銘飭令傅振邦前赴青萊一帶挑選各營兵丁千名  
歸其管帶擇要扼守如兵力尙形單弱並著閻敬銘添撥兵勇妥  
籌布置恩夔亦須督練滿洲官兵豫籌防範不可稍涉大意該副  
都統如已起程來京陛見著於接奉諭旨後趕緊折回青州辦理

防務青石關一路最關緊要閭敬銘總須視賊所向迎頭截擊豫杜賊竄該處之路方爲妥善畿南一帶防務尤關緊要劉長佑見赴京東一帶查看橋道距省較遠所有畿南一帶防務卽著李鶴年暫行督辦並著飭令余承恩范梁楊毓楠實力扼防其安住所帶之馬隊卽由李鶴年飭令由威縣曲周一帶前赴大名相機截剿黃河礮船飭令嚴密巡防以固藩籬李鶴年仍毋庸出省所有省南防務情形並准由該臬司專摺具奏山西澤潞蒲解防務王榕吉陳湜當力加整飭不可以賊蹤稍遠稍形懈弛豫省河北一帶與直東地界甚近吳昌壽當飭楊長春崔廷桂等軍嚴防竄突認真截剿皖省亳宿一帶喬松年當飭在防將士嚴密堵遏毋稍鬆懈正在寄諭閒據曾國藩奏賊竄東境見籌布置一摺與閭敬銘所奏情形大略相同曾國藩見飭張樹珊色爾固善馬步各隊

馳赴山東協剿並調臨淮勇丁二千續往著卽飭令迅速前赴  
省其移紮歸德之周盛波一軍並調赴徐州之臨淮一軍均可  
豫省東路之兵聯絡聲勢防賊回竄並飭潘鼎新一軍力扼運河  
東省各軍均由曾國藩妥爲調度賊勢見在東趨曾國藩仍可駐  
紮徐州就近督剿暫緩馳赴許州另片密陳湖北軍務仍請全歸  
官文節制調遣等語官文職任兼圻疊經諭令將鄂省防剿事宜  
妥爲布置本未寬其責任朝廷所以未經明降諭旨者亦與曾國  
藩見奏之意相符惟曾國藩見在督師剿賊所有楚省派出援軍  
亦應統歸節制調遣以期呼應較靈原片摺著卽畱中又另片奏  
金國琛見有查拏滋鬧勇丁等事未便遽令赴甘等語卽著照所  
請辦理將此由六百里諭知曾國藩劉長佑喬松年吳昌壽閻敬  
銘恩夔並傳諭王崱吉陳湜李鶴年知之○諭楊岳斌奏官軍攻

克白季村逆堡並黎獻一軍進規肅州情形各摺片楊能格奏固  
原兵勇潰變平固涇慶情形危急並雷正綰所部請旨派員統攝  
各摺片覽奏均悉昨據德興阿劉蓉奏甘省軍情猝變陝西局勢  
可虞已諭令都興阿等調撥兵勇妥籌防範見據楊能格奏稱固  
原各營兵勇紛紛潰變由前敵炭山散回竄擾固原平涼圍逼涇  
州聲言卽到慶陽等語當此回逆鴟張豈可復令兵勇潰亂患生  
肘腋著都興阿穆圖善懷遵前旨迅飭金順西蒙克西克兩起馬  
隊馳赴陝甘交界一帶相機扼堵德興阿劉蓉趕緊添撥數營馳  
往探蹤攔截至慶陽僅止數營不敷防剿楊岳斌遠在省城文報  
往返動逾數旬深恐鞭長莫及所有該處防軍及陝省派出之楊  
得勝鄔太愚等軍均著暫歸楊能格就近調遣以防不虞雷正綰  
所部各軍在甘剿賊頗著戰功此次因挫敗之後號令不行以致

生變著派總兵魏添應暫行統攝雷正綰所部全營責令安撫整頓並著剴切曉諭如能悔罪歸營必當寬其既往予以自新其從前出力未經請獎各案並准由楊岳斌督飭雷正綰查明奏請獎勵楊能格當督飭魏添應妥爲開導申明約束以靖亂萌毋得敷衍了事曹克忠一軍甫解鹽茶之圍卽將白季村逆堡奮勇攻克甚屬可嘉道員黎獻督兵進攻肅州踞逆屢挫賊鋒剿辦甚屬出力著飭令該道員迅速攻勦力拔堅城期與王斌一軍會合一處肅清出關道路毋稍遲緩其成祿聯捷鶴齡各軍並著該督傳旨嚴催迅速出關不准藉端逗畱將此由六百里諭知都興阿穆圖善楊岳斌德興阿劉蓉並傳諭楊能格知之○諭昨據德興阿等奏提督雷正綰在固原兵變各情當經諭知楊岳斌等傳諭雷正綰令其立功自效本日據楊能格奏雷正綰自金積堡失利之後



革去幫辦所部兵勇本因甘省地極寒苦糧餉俱缺視爲畏途惟以保舉爲獎勵之地該提督於以前克復城寨等案尙有積壓未辦保奏者既革幫辦則保舉絕望以致紛紛潰變雷正綰彈壓不止屢思自盡各等語與德興阿等所奏情形略異自是德興阿劉蓉相距較遠且係接據州縣稟呈不及楊能格之聞見真確雷正綰所部兵勇糧餉缺乏因思譁潰而該提督輒思自盡其情甚爲可憫前已嚴諭崇實等迅速撥解餉需解到時即可散給屢次出力員弁並諭楊岳斌查明未經獎敘者卽行保獎矣該提督自入甘省後屢著戰功朝廷深爲嘉許其金積堡挫敗之事咎有應得該提督膺國家干城爪牙之寄方當奮勉自效以贖前愆從前帶兵各員均有身獲重咎後來仍任統帥者其功罪皆視其人之自取豈得因一蹶之後遽作自盡之計甚屬有孤期望著楊岳斌德

興阿劉蓉楊能格傳諭該提督拊循將士其圖奮勉立功則朝廷  
許其自新必當衡其戰績立沛恩施如此剴切開導諒雷正綰具  
有天良必能感激圖報也將此由六百里密諭楊岳斌德興阿劉  
蓉並傳諭楊能格知之○予甘肅陣亡知府楊炯等祭葬世職○  
戊辰諭軍機大臣等恩合等奏兵勇剿賊獲勝情形並請將張鼎  
鏞飭回遼陽本任各摺片盜匪由廣甯界之小黑山竄至平安正  
安等堡經高春等督勇追截該逆逸入新民廳之新立屯及葉馬  
臺等處豐恩等統率兵勇分路接捕雖經進剿獲勝而該匪於小  
黑山殺傷兵勇燒毀營房新立屯之戰外委馬振東死之亦傷亡  
兵勇多名是此次官軍不過小有斬擒並未痛加掃蕩而賊勢鴟  
張如昔亦未能稍戢兇鋒著恩合富平阿寶珣嚴檄派出之豐恩  
等務將該匪認真接捕悉數殲除以期地方次第肅清毋得有名

無實致令賊勢日張貽後日以無窮之患此次出力官弁著恩合等暫行存記俟續著勞績再行奏請獎勵豐恩所部既據恩合等奏稱足敷剿辦卽著飭令張鼎鏞仍回遼陽本任該員所帶之勇並著撤回酌量去畱安爲辦理將此由五百里各諭令知之○諭昨據曾國藩等奏髮捻各股見竄東境官軍追剿各情形當經諭令曾國藩仍駐徐州就近督剿任賴各逆結黨東趨得潘鼎新一軍迎頭截擊曾國藩復派張樹珊等馳往協剿自可無虞北竄惟張總愚一股尙在南陽一帶盤旋見經官文派姜玉順等會合豫軍攻剿該匪被剿窮蹙不西趨秦境必北擾晉疆陝省與豫省毗連處甚多路路可通山西省雖有黃河之隔而霜降水落搶渡甚易該省素稱完善且爲畿輔屏蔽稍有疏失關繫非輕曾國藩見在徐州調度正當喫緊若復令分兵進駐豫西邊境實有鞭長莫

及之勢曾國藩昨奏請因時制宜勦以力之所能及先剿東路不必遽赴許州權衡緩急悉合機宜但河洛見無重兵豫省又無著名宿將可以調派該處居天下之中空虛可慮因思李鴻章謀勇素著且年力壯盛可以親歷行間著卽親自督帶楊鼎勳等軍馳赴河洛一帶扼要駐紮將豫西股匪迅圖撲滅兼顧山陝門戶俾西路張總愚等股匪不至闖入保全完善一俟西路剿匪事竣卽行馳回兩江總督署任似此東西兩路通力合作曾國藩旣無西顧之憂得以專注東路則剿辦更易得手至李鴻章此次帶兵赴豫或由水路取道襄樊或徑赴清淮循河西上均由曾國藩李鴻章斟酌妥辦目前東南各省漸就肅清卽粵東餘孽疊據左宗棠奏報汪逆勢窮思竄被官軍擊敗黨與星散屢屢投誠阱獸釜魚殲除在卽惟盛京馬賊逐漸猖獗竟敢與官軍接仗將來非大加

勦洗不可甘省回匪勢熾甚熾而陶茂林部勇一潰再潰近日雷正綰一軍又復紛紛效尤並有圍撲涇州慶陽之信甯夏久未攻拔而靈州回匪出沒於定邊花馬池一帶若叛勇與回匪勾結延及陝省爲害不可勝言是東南軍務漸次告竣而東北西北兩路軍情辦理尙無頭緒朝廷慮及皖豫髮捻一日不除則鄰省防兵一日不撤旣糜餉需又耗兵力盛京甘肅勢難兼顧宵旰實深焦灼是以特諭李鴻章督兵赴豫與曾國藩兩路夾攻俾髮捻股匪剋日殄除直東皖豫一律廓清然後騰出兵力相機調遣似於大局甚有裨益曾國藩李鴻章均以天下爲己任諒必以此旨爲然如或別有所見亦不妨據實奏聞以備採擇至兩江總督事繁任重李鴻章帶兵出省不可無人署理吳棠辦事認真且在清淮駐守有年於軍務亦能整頓卽著吳棠署理兩江總督其漕運總督

印務卽交與李宗義暫行署理江蘇巡撫與洋人交涉事件頗多  
丁日昌籍隸粵東熟悉洋務以之署理江蘇巡撫可期勝任曾國  
藩等接奉此旨彼此函商如果意見相同卽著迅速覆奏再明降  
諭旨分飭遵行將此由六百里各諭令知之○左宗棠徐宗幹奏  
汪海洋伏匿鎮平時遣賊黨至分水均一帶窺犯閩邊希由武平  
以竄江西副將張福齊等已抵武平進紮下壩嚴防後路高連陞  
黃少春等進紮鎮平北路廣福鄉羅洞等處賊於縣城東北路亭  
下修築堅壘外開長濠踞險固守八月初一日高連陞督兵分路  
進剿該逆突出數千人拌死來撲副將曹光德等督隊馳擊斃賊  
甚多適黃少春率親兵馳至賊仍退入卡內初二日汪逆親率悍  
黨數萬分三路直撲分水均新壘高連陞督飭官軍奮勇衝擊該  
逆紛紛敗走我軍乘勢掩殺汪逆復率同祐逆李遠繼等分左右

雨路翻山而下將鈔出分水均各營之後高連陞飭曹光德等分隊迎擊賊匪退聚山巔李大有立斃悍賊多名李士順在右路迎敵先已將賊擊敗旋因中路之賊漸趨右路愈聚愈多李士順衝入賊中勢幾不支適黃少春督隊繼進祐逆李遠繼復偪諸賊回撲劉甫田大呼陷陣劉端冕等各下馬奮擊血戰而前賊眾披靡奪路狂竄官軍追過山坡高連陞等復截殺無算汪逆見兩路之賊俱敗逃回鎮平我軍追殺數里統計殺斃悍賊三千餘名生擒百數十名內有僞天將等賊目十餘名其自相蹂藉墮崖落澗死者不下數千名康國器一軍於七月三十日進攻鎮平城東南九曲炭腳石古排賊壘逆首胡瞎子率黨分三路來援康熊飛等分投迎敵鏖戰逾時斃先鋒悍賊二十餘名賊眾翻山逃遁官軍轉戰而前斃賊無數追抵石古排賊壘濠邊僞大將張詳瞬周建榜

及賊目楊潰雲李拮寬盧東芳等率黨千餘赴康國器營乞降康國器受之分別挑畱遣散查汪逆經官軍疊次剿敗勢本窮蹙急思覓路逃竄又恐閩軍蹙其後不脫免脫妄圖衝犯閩邊各壘蓋欲由間道以竄江西邊界也據康國器稟報長樂逆首林政揚已將偽來王陸瞬得擒獻到營輸誠自首卽日可期蕝事廣東騰出龍長兵力自可速進鎮平西南以相犄角見在王德榜一軍由象洞前進高連陞黃少春康國器等軍距鎮平縣城均不過二三十里臣等本擬飭高連陞西出平遠會同劉清亮盤龍岡之師遏賊奔衝昨據江西撫臣劉坤一函稱見派席寶田等軍出平遠分駐大柘東石會師進剿是鎮平西路亦有重兵與閩粵聲勢皆可聯絡高連陞等軍卽可由鎮平北路東路東南路併力偪攻毋致顧此失彼臣等惟當慎以圖之此次剿賊尤爲出力之總兵劉端冕



等謹先行開列仰懇 天恩分別獎勵江西巡撫劉坤一奏臣於  
八月十八日馳抵江西省城因南路防務甚急當檄劉連捷朱洪  
章移營南安並令朱南桂填紮吉安適接婁雲慶席寶田稟報本  
月初九日該提督等以兩營畱守平遠親督八營進扼東石其餘  
八營次日繼進是夜汪逆欲乘我立營未定傾巢而出臣令叛卒  
從茅寮坪鐵山障梅子畚數路來攻席寶田當令各營嚴陣以待  
初十日賊果大至眾約五六萬人席寶田令道員謝蘭階等迎擊  
自率親兵督戰以總兵魏玉彩韓進春等分扼左右兩路之賊中  
路各營如牆而進賊匪恐眾來迎我軍環開槍礮賊甚多劉建  
業等先率兩營陷陣謝蘭階等鈔出陣後賊遂不支我軍縱橫掩  
殺斃賊無算時右路之賊正與我軍相持見中路賊敗歸路已斷  
亦遂驚潰其田壘之賊數千人擒斬殆盡我軍萃於右路賊匪堅

踞嶺上席寶田令謝蘭階等迎擊之賊且戰且退我軍追斬百餘名是日統計殺賊六七千名生擒二三千名其左路高嶺之賊被我軍擊敗後潛伏山谷是夜翻山欲竄茅寮坪與汪逆合股席寶田派黃元果等馳往襲擊斃賊不少餘黨數千人皆棄械就撫十一日僞東平王擁眾繼至汪逆亦從茅寮坪率黨七八萬復來奪路席寶田魏玉彩等截擊僞東平王一股自督各營迎剿汪逆大股賊分數路猛撲我軍槍礮環施斃匪二千餘人賊猶拌死衝突劉建業躍馬入陣斬黃衣賊目一名榮維善率隊繼進橫截賊陣賊乃披靡汪逆憤甚欲督羣賊轉圍我軍乘勝驅逐賊遂敗潰翻山而走日約斃賊三四千人內有僞小王宗汪林僞天將胡春幅郭汝和僞朝將范秀魁及天安天燕等賊目十餘名魏玉彩等復將僞東平王一股擊散招降七八千人並有赴粵軍就撫者統計

兩日其招降一萬三四人婁雲慶知賊爲席軍所挫折竄大柘當飭總兵劉順隆馳往邀擊十二日行至良畚卽與賊遇劉順隆令洋礮隊直前擊之斃賊三千餘人婁雲慶恐賊由大柘山中坑以犯長甯之篁鄉堡卽於十三日飭劉順隆徑趨大柘自率各營由閒道馳赴中坑行至要馬岌適鳳祐兩酋胡瞎子李遠繼領羣賊擁至瞥見官軍登時驚走退至亂石徑地方我軍追至賊眾擁擠落溺死者無數婁雲慶派隊由小路繞出邀賊劉順隆由大柘會合閩粵之師追擊賊腹背受敵分股向西南竄去我軍追至南極地方又斃賊二千餘人生擒一百四十餘名訊據賊供有汪逆因鎮平乏食欲乘江西防軍移動意圖伺隙回竄之語今雖在東石大柘疊次大挫然其人數尙多難免橫流旁溢見在席寶田婁雲慶飛商駐防篁鄉堡鵝公墟各軍嚴爲之備合力聚殲各等情

臣向恐賊繞出定南以及南安當飭令席寶田婁雲慶確探賊蹤所向派隊力追並取捷徑攔頭截擊如得劉連捷朱洪章等速抵南安祥字營速抵定南可衛江西即可兼顧湖南臣復嚴檄南贛吉林袁瑞各郡縣實力防範使賊無隙可乘仍隨時察看情形儻賊氛逼近江境臣即親往督剿其力戰陣亡之參將許貴元等相應請旨飭部從優議卹上諭汪逆盤踞鎮平疊經官軍剿敗急思覓路逃竄遣黨至分水坳一帶圖由閩邊竄犯江西高連陞黃少春等分路縱擊殺賊甚多汪逆復逃回鎮平席寶田由平遠進扼東石連獲大捷斬馘及招降者甚眾逆眾折竄大柘復經婁雲慶擊敗江閩等軍入粵先後敗賊賊勢已蹙惟汪逆人數尙多難免橫流旁溢之患左宗棠見飭高連陞等由鎮平北路東路東南路進逼而席寶田婁雲慶與駐篁鄉堡等處之兵皆已嚴爲之備

著左宗棠劉坤一卽檄飭各軍實力進攻毋任竄逸左宗棠當懍  
遵疊次諭旨迅赴粵境調度各軍以一事權劉坤一仍檄催劉連  
捷等速抵南安定南以固江省門戶一面嚴催入粵之席寶田婁  
雲慶各軍會合閩粵各軍協力圍剿投誠一股人數甚眾著妥爲  
安插毋稍大意左宗棠奏長樂逆首林政揚已將僞來王陸順得  
擒獻到營輸誠粵東騰出龍長兵力自可速進鎮平西南與各路  
援軍互爲犄角著瑞麟郭嵩燾檄令卓興等移紮鎮平聽左宗棠  
調遣以資得力將此由六百里各諭令知之○直隸總督劉長佑  
奏髮捻分竄蘭考擾及黃河東岸見飭水陸各軍嚴防得旨卽著  
嚴飭余承恩等扼要駐守相機防剿一面咨會閩敬銘聯絡聲勢  
一體嚴防並懍遵昨日寄諭責成李鶴年實力督辦毋稍大意○  
子廣東陣亡參將許貴元祭葬世職○己巳諭軍機大臣等林鴻

年奏請調階州得勝楚軍並請招商墊辦銅廠各摺片階州周達武一軍昨經劉蓉等奏甘省雷正綰陶茂林等潰勇鬪至陝邊喫緊請調周達武所部李輝武五營赴陝業經寄諭崇實駱秉章將此軍趕緊調派入秦林鴻年此奏自尙未悉前旨該撫見由敘州進紮昭通而唐友耕劉嶽昭兩軍尙爲黔匪牽掣急切尙難入滇著崇實駱秉章斟酌情形如有可調之軍卽另行抽撥一旅隨同林鴻年進紮昭通以壯聲勢俟唐友耕等入滇再將此軍撤回所需月餉卽由川省籌給毋令缺乏林鴻年摺所稱近聞東回派隊出迎誠恐蜂擁而來無從彈壓等語滇省逆回拒命惟迤西一帶叛迹昭著其東路如東川昭通等屬回民非不可用此時該撫初入滇境該地方漢回團練自必相率出迎正當開誠布公示以坦白使漢民有所稟承回民亦不生疑貳則以後滇事方可著手古

人推心置腹雖獷悍不庭猶能撫爲己用惟在莅任之初羣情觀聽足以懾服其心耳該撫其安思報稱毋得心存畏憚致誤事機所稱雲南廠地久廢砂丁失業流而爲匪藩庫又無銅本可放後患更爲可慮請將東川之廠暫行招商墊辦抽收課釐等語自係權宜辦法卽著照所請行惟事同勦始尤須慎擇廉幹公正之員妥爲興辦以免別滋事端一俟軍務竣後仍卽行由官辦運以復舊章將此由五百里各諭令知之○安徽巡撫喬松年奏捻匪屢敗將由歸德以竄曹州見飭各軍追剿並防回竄得旨毫宿一帶喬松年務飭在防將弁實力防範毋令再行回竄如竄近皖省邊界仍飭出境迎剿毋分畛域又奏請飭留國藩毋庸駐紮許州批軍情旦夕異宜該撫惟當相機妥辦留國藩前已有旨令其仍駐徐州矣○于安徽陣亡遊擊劉廷幹祭葬世職○庚午諭軍機大

臣等恩合等奏大股賊匪回竄仍畱兵勇攻剿並富平阿暫緩起程各摺片賊匪大股千餘名由吉林回竄昌圖廳接壤八家子一帶經恩合等派令豐恩等帶隊至法庫邊門迎剿並畱張鼎鏞所帶勇丁六百餘名會合進擊惟此起股匪黨與眾多盤踞未散其由西追竄之逸匪尙有二百餘名亦向北奔逸該匪等往返滋擾總未大受懲創若再不亟圖撲滅勢將益形滋蔓辦理更屬棘手恩合務當嚴檄在事文武實力追捕總以殄盡爲期不得有名無實縱令奔逸賊匪旣由吉林回竄何以未見追兵趕到著阜保迅飭派出之追兵跟蹤會剿力圖埽蕩毋再遷延致滋貽誤富平阿雖甫經到任惟豐恩等兵勇後路亦須有兵接應著恩合等相度情形如須富平阿帶隊出省卽隨賊所向儘力窮追不可因愛惜經費得有勝仗卽行撤兵如果餉需支絀不敷應用卽著奏明請



旨盛京見有兵力是否足資剿捕如尙須添兵助剿亦著迅將情形據實奏聞以便調撥鄰近地方兵丁前往會剿張鼎鏞前已准恩合等所奏令回本任所帶之勇並准撤回此次據奏請將張鼎鏞所部之勇暫畱著照所擬卽嚴飭該員會合恩科豐恩等實力剿洗以期迅殄醜類前據清安奏條陳奉省緝捕事宜一摺尙屬切要著恩合寶珣認真辦理該侍郎原摺著鈔給閱看將此由五百里各諭令知之○調江南礮船赴山西河防教演水戰○修福建臺灣戰船○壬申諭軍機大臣等官文等奏楚軍赴豫剿賊獲勝南陽解圍吳昌壽奏南北兩路分途剿辦請調安住所部赴豫各摺片張總愚股匪游弋於南陽新野一帶復於八月十五日猛撲南陽府城經楚豫兩省官軍分路擊剿楚軍於瓦店東北獲勝南陽之賊盡行敗竄豫軍擊退撲城賊匪復克周寨畢寨等處惟

此次兩省之軍僅斃賊數百人並未大加懲創該逆見過銅河以東擾及唐縣暨裕州以南南陽以北地方是南陽雖已解圍而賊勢並未稍衰伺隙乘虛又將復逞著官文鄭敦謹嚴飭姜玉順等軍併力追剿不准稍分畛域吳昌壽見飭張學醇接帶陳國瑞五營與善慶馬隊馳會張曜等軍前後夾擊務卽合兩省兵力將此賊就宛裕一帶實力殲除以收夾擊之效毋得彼此觀望致誤戎機浙川爲入郛門戶且逼近商雒尤當督飭各軍嚴防竄越擾及陝疆阜陽之賊由蘭考擾及山東見聚於荷澤東明境內已疊據曾國藩閻敬銘先後馳奏寄諭直東豫各督撫嚴防河岸杜其北趨著吳昌壽嚴飭馬德昭五營及河北鎮道楊長春等力扼黃河以防偷渡並將黃河船隻一律提歸北岸其蔣希夷一軍一俟稍爲休息仍飭繞出賊前與曾國藩派赴山東之張樹珊色爾固善

等軍聯絡夾擊毋任賊勢愈趨而北安住所帶馬隊千名見赴大名一帶堵剿河北之防至關緊要吳昌壽所請調赴豫省之處著毋庸議其富森保托倫布等馬隊自係已隨色爾固善派赴山東加蓋道大股回竄河南此軍自可跟追赴豫著曾國藩安籌調遣此外如有可撥馬隊即著曾國藩先行酌量抽撥赴豫歸吳昌壽調遣庶該逆南趨亦有騎兵截剿不至任賊奔突方爲妥善將此由六百里各諭令知之○諭本日據聯捷馳奏續收各回村擒斬首要並著名回首遞稟乞降乃歷陳雷正綰兵變情事各一摺又據成祿奏堵剿西竄逆回獲勝各摺片馬化澂前向都興阿處投誠該將軍以既不獻城又不繳械恐不可信是以未准此次該逆竟赴聯捷軍營乞降是否懾於軍威抑或因聯捷張貼不論漢回止分良莠諭旨遂各聞風而至聯捷又何以不將招撫各節咨商

楊岳斌會同辦理恐聯捷一意主撫反爲該逆回所紿楊岳斌身任兼圻責無旁貸著卽將聯捷續收各回村及投誠之馬化澂等細加訪察如果出自真誠自應准其就撫妥爲安插如或意存反覆藉投誠爲緩兵之計仍當痛加剿洗以儆兇頑一切均著楊岳斌斟酌妥辦毋失事機又據稱雷正綰接到公文知已被人參奏大哭摔棄頂帽伊弟雷恒製造官偏兵反旗號擁眾退回固原通判鄭聲文反復勸導雷正綰頗有轉機而雷恒獷悍不從劫殺營官金占元句合赫明堂穆三馬化澂等搶掠固原已失等語雷正綰一軍滋事節據劉蓉等奏聞楊岳斌何以尙未奏到該督見在作何辦法著卽遵照本月初二初五等日密諭委派妥員前往雷正綰營中開誠布公剴切譬諭該提督具有天良應不致被雷恒一人所脅自取重罪也陶茂林部勇一潰再潰殊屬不成事體前

據劉蓉奏稱該營勇丁不服楊岳斌委員點驗致又潰變此風斷不可長著該督確遵前旨迅將該營潰變之由及陶茂林統率不善之處據實參辦以儆效尤至成祿奏平番逆回滋擾該提督派兵在碾盤灣剿敗後竄至窯街復有米拉溝悍回突來接應楊岳斌函致該提督移軍東向會剿鎖罕頭等語成祿聯捷本係出關援剿之師豈可任其藉詞逗畱所有平番等處回匪卽著楊岳斌調派得力兵勇前往截剿一面催令成祿聯捷等剋日拔營由肅州轉戰而前關外各城待援孔亟毋得再事遷延致滋貽誤將此由六百里諭令知之○諭林鴻年奏見繁敘州必須藉兵力前進並仿照川省捐輸辦法以濟滇餉各摺楊盛宗在昭通熟悉滇情該撫稱其雄長一方正可藉其聲勢妥爲駕馭次第進取至滇省難辦情形朝廷早已洞悉該撫由知府不數年間擢任封圻原冀

力爲其難仔肩重寄仍當懷遵疊次諭旨審度時勢相機籌辦以副委任滇餉固必取給於川惟雲南陝甘同時在川並舉勸於民力恐有妨礙前日寄諭甚明本日林鴻年擬於成都等八府資綿等四州廳飭委行營司道及蕭浚蘭等分途委員會同川省地方官辦理之處著崇實賂秉章懷遵前月二十六日寄諭妥商辦法務令兵餉有著不令林鴻年得有藉口勞崇光在黔曾否起身見在林鴻年已赴敘州將次入滇該督身任兼圻豈能坐視不顧著卽迅速啟行不准再有延緩致干重咎將此由六百里各諭令知之○予河南陣亡總兵官羅應貴祭葬世職建祠○癸酉諭內閣萬青藜卞寶第奏拏獲著名盜首請旨卽行正法一摺馬賊王景濠逃匿順天香河縣屬之渠口鎮廟內經署香河縣知縣周紹達等拏獲該犯刦案累累實屬著名渠魁著卽行正法梟示傳首犯

事地方以昭炯戒另片奏拏獲竄擾寶坻之馬賊白泳才請照奏定章程懲辦等語白泳才騎馬持械搶劫多案實屬目無法紀著一併卽行正法梟示○諭軍機大臣等官文等奏官軍乘勝進逼連破賊寨大獲勝仗一摺與吳昌壽昨日所奏情形大略相同著官文吳昌壽鄭敦謹懍遵昨日寄諭飭姜玉順張曜等乘勝進攻將敗竄唐縣泌陽之賊節節埽除毋任再有竄逸河南地方爲四達通衢該逆雖受大創而黨與仍多此剿彼竄是其慣技曾國藩在徐州東股任柱等逆未滅兵力難分且於豫楚之交界亦屬鞭長莫及鮑超新募楚勇數營前有旨令赴江粵剿賊歸左宗棠調遣見在鎮平賊勢已孤該處有江西廣東福建三省兵力合剿不難剋日殄除著官文鄭敦謹傳知鮑超如已募勇起程卽飭迅速前進如尙未起程卽毋庸赴粵將所募勇丁帶赴豫南由裕州泌

陽一路勦賊姜玉順等軍均歸其調遣仍聽曾國藩節制以一事權餉項由楚省解濟毋令缺乏如粵省軍務漸竣仍准將婁雲慶等軍調回用資得力將此由六百里諭知官文曾國藩吳昌壽鄭敦謹並傳諭鮑超知之○甲戌諭內閣吏部奏開復知府可否仍戴原賞翎枝一摺據稱定例革職人員不准戴用原翎如因本案開復仍准戴用茲花翎知府高振洛前因不能附和田興恕辦理釐穀經田興恕奏參革職嗣經貴州巡撫張亮基查明奏請開復原官惟原奏內未將本案另案開復之處分晰聲敘可否仍准戴用原翎請旨飭遵等語高振洛參款既屬情有可原其開復原官自應照本案開復辦理著准其仍戴原賞花翎以符定制近來降調革職人員往往因未奉拔去翎枝諭旨託詞戴用其另案開復各員亦或恃無不准戴用原賞翎枝明文輒圖蒙混殊屬非是嗣



後因事降調之員未奉旨拔去翎枝者除一品至五品仍准戴用外大員降至六品以下以及革職各員一概不准戴用其開復原官者必須本案開復或奉特旨賞還及續有軍功經大臣督撫奏請開復翎枝方准照常戴用儻因另案開復或捐復原官仍不准冒昧戴用以昭體制而杜徼幸○諭軍機大臣等瑞麟等奏會剿鎮平逆匪凍逆率黨竄出一摺凍逆困守鎮平自花旗投誠後其勢日孤經方耀等分路進攻又經江閩各軍會合追剿該逆馬隊數千突向新鋪一帶奔竄鎮平縣城旋即收復逃竄之賊沿途被官軍節節追殺精銳漸就散亡正宜乘其潰敗之際奮力痛剿將全股悉數殲滅以除後患見在席寶田已向長潭東石迎頭擊賊其石正大柘及樓車等處亦有康國器高連陞黃少春等各督閩兵分路追截卽著左宗棠劉坤一嚴飭各軍遇賊卽擊務須合力

痛殲埽除淨盡不得以賊勢已窮稍涉大意石正樓車地方與江西接壤劉坤一仍當督飭江省防邊各軍慎固防維毋令逸氛闌入江楚徐宗幹亦當飭閩邊防兵一體嚴備以資堵遏粵省方耀鄭紹忠兩軍見已隨賊所向盡力窮追李福泰移赴龍川相機剿辦任星元等嚴守南雄等處布置尙屬周密著瑞麟郭嵩燾等迅飭該員等乘勝追殺不准一名漏網毋令死灰復然貽患後日將此由六百里各諭令知之○賞五城貧民棉衣銀○乙亥諭軍機大臣等閩敬銘奏匪擾定陶扼剿獲勝見仍退踞荷澤曹定之交連日派軍進剿並籌布東防河防各情形一摺逆匪蓄意東趨並未大受懲創見在逆眾數萬盤旋荷定之界蓄謀甚狡潘鼎新一軍已由鉅野移赴荷澤著曾國藩卽檄催前進與前派入東之馬步各隊會合夾擊毋任東竄山東兵力甚單冉堦黃鎮兩軍閭敬

銘務當嚴飭楊飛熊等激勵兵弁相機合擊毋稍退縮濮范一帶  
卽責成衛榮光督率兵勇民團布置趙三元等礮船著閻敬銘催  
令挽入黃河與原駐黃河之礮船會同直隸礮船分段布置以期  
周密賊匪逼近東明開州等處防務緊要著劉長佑檄飭李鶴年  
督飭兵弁認真防範毋稍大意另片奏密陳山東梟匪多屬回民  
鹽匪販私求食與寇盜不同緩治之則散急治之則亂宜責在官  
吏不諉之巡商宜檢其渠魁以解餘黨宜購覓眼綫以梟治梟宜  
以兵爲鎮壓不以兵爲捕治見飭署武定府知府張鼎輔將拒捕  
首犯密拏懲辦等語梟匪肆行若不嚴爲捕治必致貽患將來該  
撫惟當不動聲色檢其渠魁斷不可姑息養奸釀成巨患俟東路  
賊匪肅清仍當認真籌辦本日據長善奏臨榆以北沿邊各口殊  
覺空虛等語著劉長佑揀派幹員籌添兵力責成綠營員弁於臨

榆迤北所轄地面實力梭巡與旗營弁兵互相偵緝以期周備毋稍曠誤將此由五百里各諭令知之○諭楊能格奏固原前敵潰營見經設法安撫添籌接濟並請畱郭炳南募勇兩營各摺片據奏雷正綰當兵勇潰變卽飛騎追趕並斬沿途搶奪勇丁十餘名及抵涇州雷正綰復連日泣諭又得周顯承領靜防堵且見何成蛟等被拏伏法該營勇始各感畏陸續折回固原等語覽楊能格先後所奏情形是雷正綰所部潰變非不力爲彈壓實因呼應不靈所致該提督並無甘心叛逆情事與德興阿劉蓉聯捷所奏迥不相符著都興阿穆圖善楊岳斌確切查明將雷正綰兵變實在情形迅速具奏並著劉蓉將前奏因何不符之處據實奏聞都興阿等如查明雷正綰尙非意存跋扈卽著向該提督剴切開導令其會同魏添應安撫士卒重整部伍奮勉圖功以贖前愆一面將

該營爲首倡亂之勇丁訊明正法以昭炯戒楊能格見擬將河東報解在途之餉銀三萬兩全數截畱徑解涇州糧臺並飭安化縣將日運麪斤加倍添撥接濟卽著照所請行並著加意勸勉拊循以弭變故都司郭炳南募勇兩營因不及遣散赴楊能格營投效卽著准其畱營揀派得力營官統帶訓練扼要駐紮以資攻剿將此由六百里諭知都興阿穆圖善楊岳斌劉蓉並傳諭楊能格知之○丙子諭內閣劉蓉奏雷正綰營兵勇潰變見在辦理情形一摺雷正綰一軍由鄂入陝疊著戰功轉戰而西在甘肅地方屢次摧堅破敵克復城寨甚多前因金積堡剿賊失利當將該署提督革去幫辦用示薄懲該營將弁自宜愧勵交加立功自效茲據劉蓉奏稱該部將胡大貴等竟敢因師挫糧缺譁潰滋事迫脅兵勇在固原一帶肆行殺掠圍逼涇州經提督周顯承等率同在城文

武登陣守禦將謀爲內應之副將何成較正法並將逆黨匡文武等誘擒被脅兵勇復經周顯承等諭以大義招撫解散胡大貴等知眾心不附相率遁去雷正綰親至涇州曉諭兵勇誓死與賊決戰等語雷正綰於所部將士謀變未能卽時懲辦本有應得之咎惟念該提督平日打仗奮勉勞績卓著著從寬免其置議此係朝廷破格恩施該署提督宜知感知愧倍加策勵以贖前愆記名提督胡大貴副將雷恆李高啟乘機倡亂實屬罪不容誅均著卽行革職緝拏正法以昭炯戒○諭軍機大臣等前據文祥奏籌剿馬賊務使淨絕根株一摺當經諭令恩合等妥籌覆奏嗣據恩合富平阿麒慶阿克敦布廉至劉長佑等先後奏到各抒所見均與文祥所奏大略相同茲據軍機大臣恭親王等奏各路備調官兵坐鎮彈壓不必輕動資成地方官飭差接拏請飭各將軍等轉飭所

屬曉諭居民無生疑懼馬賊中有悔罪自新者酌予獎賞嚴定州縣諱盜及鄰封協緝不力處分文武獲盜官員應請酌覈議獎請催盛京等處揀派官軍各等語所籌均屬周密所有盛京直隸吉林熱河等處各豫派出官兵及備調兵專爲剿賊之用如該匪伏而不動但宜坐鎮彈壓不准騷擾良民仍責成地方官飭差役拏拏匪首不准稍涉聲張妄拏無辜著恩合等曉諭居民照舊安居無生疑懼如有兵役騷擾立按軍法懲辦州縣失察嚴行參處務期法在必行不得徒託諭告具文馬賊中有悔罪自新者均准照所奏章程按其獲盜名數分別獎賞均著按照恭親王等原奏章程於告示內詳細逐層聲敘明晰俾家喻戶曉互相勸勉地方盜案限三日申報仍照舊例立限開參無庸照新章嚴處如獲有鄰境盜案准其抵免處分儻諱匿不報卽查明參革從重治罪該上

司有徇隱不報者一併治罪鄰封協緝不力著各該管上司從嚴  
參辦兵役通盜知而不首者訊明後卽將該兵役斬梟示儆如拏  
獲馬賊係著名巨盜及斬梟盜犯多名准酌給翎枝升階破格獎  
勵並著吏部兵部將地方官拏獲本境鄰境盜犯應如何將功抵  
過及破格獎勵之處酌定獲盜名數分別覈議先行奏定章程候  
旨遵辦此次劉長佑阿克敦布廉至等調撥各兵或擇要扼擊或  
勤操備調均著遵照前奉諭旨雇覓眼綫會同捕剿不得稍涉鬆  
懈所需口糧寬爲籌備如有不敷據實奏聞未可吝惜小費致誤  
大局其關內外扼要處所向有額設官兵著卽給與全餉令於無  
事時隨時操演不得有缺額雇替等弊恩合阜保麒麟慶等所派官  
兵未據奏到著卽挑選得力兵弁迅速具奏毋稍玩延其蒙古官  
兵並著知照伯彥訥謨祜一體照辦劉長佑查勘邊牆已否周歷



應如何擇要設防並趕緊興修之處著據實具奏阿克敦布等所籌會哨日期及整頓卡倫之處均著照辦惟當實力奉行毋得空言塞責順天府所轄地方萬青黎卜寶第已團練馬勇力行保甲著嚴飭所屬認真辦理軍機大臣片一件均著鈔給閱看文祥前奏參賊誨盜各情一摺與恩合麒慶等所陳整頓吏治武備摺大略相同並著鈔給恩合等閱看該署將軍等當各就地方情形隨時整頓以清盜源而肅吏治將此由四百里各諭令知之○諭德興阿劉蓉奏甘回大股圖犯陝疆請分撥馬步各軍截剿雷營潰勇偏涇搶掠經守城文武懲辦撫輯事變稍定逆回仍撲涇州各摺雷正綰部將胡大貴等乘機生變經該署提督涕泣開導不肯聽從時回酋赫明堂穆三楊大娃子率大隊回眾由固原前來胡大貴等俱與合併雷正綰未能申明紀律約束各營致令所部釀

成事端聚眾戕官將固原廛市搶掠一空並劫奪餉銀軍火等項該署提督統率無方咎有應得姑念雷正綰由陝入甘轉戰而前素稱勇敢兼值糧餉缺乏備歷艱辛自應寬其既往俾得以功抵過該署提督如能將爲首倡亂之胡大貴等立即擒斬並曉諭赫明堂穆三楊大娃子速戢邪心使就馴服仍當破格施恩以示朝廷終始成全至意如赫明堂等不服開導亦惟責成雷正綰重整部伍痛加勦洗務將此股叛回迅速殄除想雷正綰受國厚恩定當深自愧奮勇往圖功也赫明堂等見各帶馬賊千餘名由鎮原甯州崇信三路圖竄陝疆靈州逆回馬化澂又率馬步賊各萬餘由鎮原至涇州之北原圖分南北兩路直犯陝西逆回與潰勇狼狽爲奸係屬意中之事應如何杜其勾結分路勦辦之處著都興阿穆圖善楊岳斌楊能格相度機宜妥爲籌辦德興阿等請飭穆

圖善赴陝援剿陝省西路邊防甚形喫重本省兵力不敷分布著  
穆圖善迅卽帶領所部馬隊親兵督同金順西蒙克西克兩軍繞  
由延鄜馳赴邠長協剿以資厚集毋稍遷延穆圖善所帶步軍除  
衛隊親兵二百名外其餘各營仍畱甯夏併歸都興阿統轄調遣  
如該回逆已入陝境著楊岳斌迅派曹克忠統率所部馬步由鹽  
茶徑趨平涇跟蹤躡剿德興阿劉蓉仍當就見有兵力速籌堵禦  
前後夾擊毋得徒事防守方爲妥善另片奏周達武所部十五營  
規剿松潘該處九月卽已大雪封山來歲春融方可進剿置勁兵  
於無益之地亦殊可惜請飭周達武赴甘川省另派妥員赴楚募  
勇明年二月可抵松潘一轉移閒於軍務較有裨益等語前有旨  
令李輝武帶步隊五營隨同趙長齡由川赴陝此次雷營部勇潰  
亂回匪更肆鴟張甘省東路及陝省之西南路並無勁軍抵禦周

達武所部十五營能否抽撥赴甘之處著崇實駱秉章酌度情形  
妥爲辦理另片奏陶營潰勇圖由興商竄回湖北已諭知官文等  
派兵防剿其鳳縣另股潰勇就撫者尙有二千七百餘人之多雖  
經派兵押送出境難保不沿途滋事著德興阿劉蓉飛咨該潰勇  
原籍及經過地方一體防範毋稍疏虞將此由六百里諭知都興  
阿穆圖善崇實駱秉章楊岳斌德興阿劉蓉並傳諭楊能格雷正  
綰知之○諭劉蓉奏陶茂林營潰勇分股竄入陝疆並據獲賊供  
稱叛勇多籍湖北江南河南各省有由興商急竄湖北之說等語  
此起叛卒由甘竄入陝境不服開導屢次抗拒官軍且圖回竄鄂  
疆蓄謀甚狡劉蓉見飭駐紮商南之劉厚基一軍扼要截擊並檄  
興漢兩鎮及甯陝廳派集兵團併力兜剿著官文鄭敦謹迅卽選  
派得力將弁督帶兵勇馳赴興商一帶與陝軍會合剿辦毋任擾

及鄂陝交界致與豫省捻逆勾結益形滋蔓並著官文飛咨江南河南各督撫於此項潰勇回籍時均須一體嚴爲防範妥爲安插毋任復滋事端將此由五百里各諭令知之○署河東河道總督張之萬奏報秋汛安瀾命詣河神廟祀謝賞還張之萬二品頂帶實授河東河道總督○陝西巡撫劉蓉奏請以周達武補固原提督得旨雷正綰並未開提督缺見旣深知愧悔惟宜曲示羈縻以觀後效所請著毋庸議○予陝西陣亡遊擊蕭積玉祭葬世職○丁丑左宗棠徐宗幹奏高連陞等於分水坳擊賊獲勝後各軍分三路紮營進逼該逆洵懼八月初七八等日康國器等督隊分攻石古排對門營白果山各賊壘官軍行抵長旗嶺逆首胡瞎子列隊九曲岌頂另有騎馬悍賊數千飛奔而來康熙飛吳光亮督隊奮擊斃賊五十餘名賊死拒不退林本等左右夾擊斃賊數百名

賊始潰走康熊飛等追抵賊壘濠邊槍破環攻逆首胡泳詳卽胡  
瞎子遞稟詐降康國器飭各營乘夜急進直薄壘下守備李如奮  
勇先登中槍陣亡康熊飛督各營繼進噴筒火箭迸注賊壘頃刻  
煙燄飛騰官軍乘勢破柵而入立將石古排賊壘焚毀各壘之賊  
亦同時驚潰康國器令各營乘勝急攻鎮平縣城北抵城邊汪逆  
已率黨開西門逃竄是時高連陞黃少春等軍已由白泥湖賊壘  
埽蕩銜枚疾至各軍奪門而入搜斬逆賊千餘名當於初十日將  
鎮平縣城克復官軍蹶躑追擊至城外河邊汪逆猶驅各賊於橋  
頭力堵高連陞等分路鈔擊立斃賊目四名悍賊數十名賊大披  
靡爭搶過橋各軍乘勢逼近陣斬悍賊千餘名擁擠落水死者二  
三千名該逆分路由梅子畚大寨東石等處向平遠而遁官軍復  
追斬無數十一日黃少春高連陞由閒道直趨東石鄉見逆賊萬

餘向平遠而來黃少春等奮勇衝殺各營從左右鈔出截賊數段賊眾翻山狂竄官軍四圍勦殺斃賊千餘名另有賊股四千餘人爲官軍圍住伏地乞降黃少春受之訊據賊供僞東平王何逆隻身逃走餘黨已殫殺殆盡康國器所部追賊至竹子澳賊方設伏圖陷官軍龔長春等鼓噪而進賊齊起康熊飛忽從山前殺出林本等左右鈔來伏賊奪路分竄吳光亮從後截殺合力痛勦斃賊一千餘名將沿途賊館二十餘處一律踏毀十二日追至茅寮坪適先犯東石之賊經江軍席寶田截擊大敗折回康熊飛等復揮軍截殺斃賊甚多該逆急向大柘而竄官軍追至大柘又斃賊七百餘名計克復鎮平沿途追勦前後殺悍賊計萬餘名收降數千名見在高連陞等軍仍躡蹤緊追劉典所部亦由平遠出八尺攔截查汪海洋負踞鎮平疊思由閩竄江迄不得逞遂由平遠覓

路而竄經各軍連日痛剿殲斃極多兇鋒大挫據報賊蹤又改由石正龍虎墟一帶分路竄走如江粵各軍能嚴扼其前閩軍復緊蹙其後此股可冀盡殲此次各軍克復鎮平連日追剿勞瘁異常可否由臣等彙案保獎以示激勵力戰陣亡之擬保都司守備李如應請飭部照都司例從優議卹上諭軍機大臣等汪逆負固鎮平經康國器高連陞等督軍援剿直薄城下汪逆開西門逃竄復經高連陞等追剿斃賊甚多該逆見由石正龍虎墟一帶分路竄走如江粵各軍能嚴扼其前閩軍能緊蹙其後自可漸就殄除著左宗棠卽飭入粵各軍跟蹤追剿不可稍涉鬆勁劉坤一卽飭婁雲慶席寶田等軍迎頭截擊毋任闖入江境如由廣東興甯和平竄至南雄將來終恐爲江西湖南邊患著瑞麟郭嵩燾督飭方耀等軍認真截剿如有趨南雄信息左宗棠飭劉典一軍由武平



出江西安遠信豐急趨南安兼顧湖南邊境該督撫等總宜通力合作將此股逆眾剿盡毋畱遺孽致貽後患另片奏鮑超一軍應由該提督自爲主持等語前因粵省賊勢漸衰已有旨令鮑超募勇成軍後帶赴楚豫交界剿辦張總愚股匪仍歸曾國藩節制婁雲慶軍本係鮑超舊部仍准該提督酌量檄調著左宗棠傳知該員懍遵前旨赴裕州泌陽地方剿賊如汪逆一股辦竣並著飭令婁雲慶一軍亦赴南裕一帶交鮑超調遣以資得力又奏前與泉永道曾憲德熟習地方情形人甚明幹請令仍署興泉永道並請將曾憲德仍以道員畱福建補用等片均著照所請行惟曾憲德一員二年間由左宗棠於年終密考摺內稱其前在延建邵道任內辦事諸多諉卸才識均庸是以有開缺送部引見之旨此次復據該督保奏何以該員一人之身先後異轍如此著查明覆奏將

此由六百里各諭令知之○諭張凱嵩奏南甯賊勢已窮官軍分  
擊疊勝見募新軍赴營協剿一招逆首孫荃廣盤踞南甯府屬之  
那檀山澤兩巢經張凱嵩督飭劉培一馳往督剿分軍環攻連日  
疊有擒斬並將那檀賊巢頭柵攻拔羣賊猶憑高恃險悉力抗拒  
官軍逐日挑戰該逆閉柵不出山澤之賊並於施大路村築壘相  
持是逆眾雖被剿窮蹙仍糾黨負隅思逞困獸猶鬬之狡計見在  
覃遠璣將貴縣平塘一帶踞匪剿除率所募春字等營馳赴永淳  
協剿官軍兵力已厚著張凱嵩嚴檄劉培一覃遠璣等軍迅卽合  
力進攻務將那檀山澤踞逆悉數殄除該撫因新募楚勇九月初  
始能到粵擬俟屆期出省督剿著於湘勇到齊卽行相度機宜前  
往督辦並嚴檄諸軍剋期蒞事以靖邊陲將此由五百里諭令知  
之○左宗棠奏前經各軍稟報李侍賢自永定敗潰後夜半偷渡

隨行者溺斃數人復晁水上岸割去鬚髮逃匿山中以其能操漳  
州土音遂捏稱漳州難民人無知者夜行晝伏至六月二十八日  
隻身逃至鎮平縣令民人送信汪逆率黨郊迎並馬同入縣城因  
其舊黨百餘人泣訴汪逆猜恨之狀心不善之汪逆前曾藉詞不  
救侍逆殺其舊黨李元茂等茲見李侍賢至亦不自安遂於七月  
初三日夜密遣賊黨四人乘李侍賢酣卧時殺之並殺其舊黨偽  
王宗偽天將偽朝將等五人傳示各賊館揚言侍逆已降官軍茲  
人鎮平復結黨圖爲內應也臣等猶恐所聞不確未敢遽以人奏  
茲鎮平克復後詢之降人難民所言皆同並見汪逆所貼偽示有  
侍逆心懷險毒不得已而行此法等語則侍逆之展轉求生而卒  
遭汪逆毒手已屬無疑此賊與李秀城同爲金陵巨逆屢經官軍  
痛勦將欲就擒輒復逸去本年正月二十四日高連陞鎮門大捷

已獲其馬徧覓侍逆不得後乃知土民顏魁以破舟載之回漳也  
此次敗後潛投汪逆而卒爲汪逆所殺足見天網恢恢疏而不漏  
報聞○廣廣東澄海縣學額二名○戊寅諭內閣前因大理寺少  
卿于凌辰御史張觀鈞佛爾國春台斐音等各奏盜墓賊犯請加  
等治罪當經先後降旨交刑部都察院大理寺覈議具奏茲據刑  
部等衙門覈奏請嗣後發掘常人墳冢開棺見屍爲首者從重擬  
斬立決爲從者俱絞監候其鋸縫鑿孔抽取衣飾雖未顯露屍身  
亦應從重將爲首之犯不論次數擬絞立決爲從者絞監候其發  
掘有關名分等項墳冢分別從重加梟如有拋棄屍骨及將控告  
人殺死者照強盜得財本律不分首從皆斬所擬尙爲允當均著  
照擬辦理近來盜墓之案層見疊出殃及枯骸情殊殘忍所有已  
獲未結各犯均著照此次新定章程問擬以儆兇頑而昭炯戒○

諭軍機大臣等李鶴年奏逆匪竄擾東明縣城擾及河岸見飭各軍加意堵扼一摺逆匪竄至東明城西並有賊匪二三百騎竄及長垣縣之竹林渡口經東明縣在城兵勇並龔文林礮船分路擊退該逆仍順河下竄東省曹屬一帶見爲逆匪麕聚之區與直境毗連易致竄擾且賊蹤飄忽異常難保不去而復返亟須調撥兵隊妥籌守禦著劉長佑李鶴年迅飭余承恩范梁蔣春元等派撥勇隊馳赴東明協同守禦一有警報卽分派北岸防兵渡河夾擊以資應援其沿河各渡口並著劉長佑等飛檄龔文林等督帶礮船嚴密梭巡遇有賊蹤竄至立即會合各軍及河岸紳團實力兜截毋任闖入直境將此由四百里諭知劉長佑並傳諭李鶴年知之○調額勒和布爲盛京戶部侍郎

由理藩院右侍郎調

○己卯 上奉

慈安皇太后 慈禧皇太后啟鑒謁 東陵○諭軍機大臣等劉

坤一奏賊匪竄入江境疊擊獲勝見經出省勘辦情形一摺汪逆大股由鎮平竄出盤踞羅浮司繞入江西長甯縣之簞鄉鋪經周寬世等分路迎擊獲勝賊蹤改竄定南復經婁雲慶等擊敗見由定南竄撲龍南勢尙鴟張劉坤一已帶親兵馳往贛州督剿卽著督飭將士迅籌掃蕩毋令闖入江西腹地左宗棠有節制三省之責務當派兵越境夾擊不可稍涉延緩鎮平一帶是否尙有餘匪並著瑞麟郭嵩燾實力搜捕毋畱餘孽南韶一帶兼須嚴防回竄賊蹤飄忽異常恐其西竄湘省著劉坤一飛速咨照李瀚章一體嚴防其出力之將弁准其併案保奏將此由六百里各諭令知之○以英元爲理藩院右侍郎學士由內閣○庚辰諭軍機大臣等明緒奏伊犁軍情危急請飭催迅解餉需並請催關內援兵各摺片武隆額奏督兵圍攻賊巢追擊哈薩克情形暨請調烏科二城蒙兵

助剿各一摺伊犁軍情危急待餉孔殷各省協餉由綏遠城轉解烏科二城者已不下數十萬兩何以迄今尙未解到分釐實屬畛域太分不顧邊疆之急著明誼麟興車林敦多布廣鳳奎昌將已到伊犁餉銀儘數運解不准稍有遲誤如大路尙不能通卽懷遵疊次諭旨迅派妥員設立臺站多備駝馬由俄國邊界趕緊運赴伊城以救眉急嗣後續到餉銀並著隨到隨解毋得稽延干咎其各城量撥之款亦著明誼等一併迅速催解以專責成儻敢再有遲逾致邊陲大局或至決裂必將明誼等從重治罪聯捷等軍已疊次諭令剋日出關明緒於援兵未到之先當就見有兵力妥籌守禦以副委任明誼等截留之三萬兩餉銀前已飭令仍解伊犁卽著明緒派員迎提以濟要需塔城金頂寺回匪拒守甚固經武陞額督兵攻擊疊次獲勝轉世喇嘛固帑幹扎勒參帶領蒙兵追

勦哈薩克進攻寺內匪眾並屢次擊敗哈薩克大股馬賊窮追出卡俾回匪無從勾結實屬異常奮勇其應如何給予優獎之處著理藩院速行議奏哈薩克匪眾雖被勦潰散難保不去而復來塔城勢急兵單亟宜鄰境撥兵援應著明誼麟興車林敦多布廣鳳奎昌各於烏科兩城所屬蒙古兵內酌派精壯各一千名配帶器械軍火星速兼程馳往會勦並著廣鳳奎昌將科城存倉糧石內撥借小麥五千石支給隨征官兵解運赴塔毋得稍分畛域致誤事機將此由六百里各諭令知之○辛巳 上詣隆福寺 文宗顯皇帝 孝德顯皇后梓宮前行叩謁禮申刻行夕奠禮○賞沿途行宮弁兵半月錢糧並校尉銀○壬午 上詣 文宗顯皇帝 孝德顯皇后梓宮前行奉移祇告禮跪送 梓宮啟行 上步從里許哭不停聲由閒道至 定陵跪迎 梓宮奉安於 隆恩



殿奠酒舉哀行禮○癸未 上謁 昭西陵 孝陵 孝東陵

景陵 裕陵詣 定陵 隆恩殿 文宗顯皇帝 孝德顯皇后

梓宮前行遷奠禮○甲申大葬 文宗顯皇帝 孝德顯皇后於

定陵命大學士周祖培協辦大學士吏部尚書瑞常恭題 神

主恭親王奕訢恭代行虞祭禮 上跪送 神牌 黃輿啟行命

豫親王義道禮部尚書倭什錕布恭奉 神牌黃輿回京○以大

葬禮成予襄辦之王大臣等加級執事官員升用有差○予稽查

定陵工程之王大臣及承修各員賞敘○諭內閣朕奉 慈安

皇太后 慈禧皇太后懿旨恭親王自襄辦 文宗顯皇帝大事

以來五載於茲盡敬盡誠有條有理 定陵工程前經派令總司

稽查一切悉臻妥協本日 文宗顯皇帝 孝德顯皇后梓宮奉

安 定陵禮成瞻仰規制崇闋典儀明備悲慟之懷稍釋 在天

之靈亦慰自應仰體 文宗顯皇帝誼篤友于之心並參酌成案  
渥沛殊施以示優獎乃據恭親王以盈滿爲懼再四固辭情詞懇  
摯出於至誠不得不勉從所請僅交宗人府從優議敘惟恭親王  
誼屬親藩首參機務近來事無巨細愈加寅畏小心深自歛抑實  
能不負委任本年三月初七日所降諭旨原因其小節之疏恐貽  
愆尤之漸期望既厚責備不得不嚴業於三月十六四月十四等  
日將辦理始末明白宣示諒天下其見其聞惟慮傳之久遠後人  
不知原委莫定是非轉爲白圭之玷殊無以釋羣疑而彰忠悃所  
有三月初七日諭旨著毋庸編入起居注以示眷念勲勞保全令  
名至意○諭朕奉 慈安皇太后 慈禧皇太后懿旨前因恭親  
王之長女素爲 文宗顯皇帝所鍾愛特沛殊恩封爲固倫公主  
以示優眷茲據恭親王面奏寵異逾分夙夜難安請收回成命等

語情詞懇摯具見悃忱卽此一端亦足見其毫無驕矜之習若不  
勉從所請轉無以愜其敬慎之懷恭親王之長女著撤去固倫名  
號所有一切儀制服色仍照公主例封爲榮壽公主以示區別而  
昭寵眷○諭軍機大臣等吳昌壽奏豫省南北賊情派兵防剿聞  
敬銘奏賊竄豐沛各一摺捻匪大股數萬由荷澤竄過定陶爲民  
勇官軍擊退復竄城武單縣折向東南豐沛一帶見在豐縣之歡  
口地方屯聚去魚臺四十餘里賊蹤飄忽異常雖有楊飛熊等軍  
整頓進剿僅跟蹤尾追並未迎頭截剿痛加殲戮該撫已派副將  
王心安等越境追剿並飭潘鼎新之軍駐紮單縣楊飛熊收道滕  
縣防賊東趨卽著與曾國藩派往濟甯之張樹珊色爾固善等軍  
分路進剿毋再鬆勁賊匪裹脅數萬邊馬橫布幾百餘里若非集  
數省兵力四面兜剿將來勢敝日張辦理益形棘手曾國藩見駐

徐州正當厚集兵力與東省兵勇前後夾擊並著吳棠飭令駐防  
清淮之師會合兜剿務期實力殲除不得有名無實豐沛界南北  
之交距歸德宿州甚近並著喬松年吳昌壽嚴密扼防並聯各路  
兵勇以剿爲防至張總愚等股經豫軍截擊偏向西南復由唐縣  
等處擾及鄂省隨棗邊境該逆避兵而行奔突靡定總須鄂豫兩  
省前截後追併力夾擊方可杜賊紛竄著吳昌壽飛咨湖北防軍  
越境合剿並飭張曜等相機進攻遇賊竄向東北之路龍門礮船  
務須實力整頓不得稍形疏懈將此由六百里各諭令知之○以  
恭題 神主加周祖培太子太保瑞常太子少保○予總理喪儀  
值班扈從之王大臣官員及直隸辦差員弁加級有差賞守護  
定陵拜唐阿兵丁沿途兵丁一月錢糧並夫匠等銀○乙酉 上  
奉 慈安皇太后 慈禧皇太后回鑾○諭軍機大臣等寶珣奏

賊匪復竄興京官兵接仗失利情形一摺賊匪由噶斯伙洛進邊並由開原縣八家子闖入興京城守尉清凱所派之兵於木奇接仗失利復有另股盜匪二百餘名由東邊突入欲赴新兵堡該處距陵街僅四十里恩合見已出省進剿著卽探明賊情酌量緩急妥籌剿辦或責成派出之協領德音泰前往攻剿抑或恩合親自督隊必當審量妥協方可無誤事機賊匪如此猖獗況距陵街甚近尤宜籌畫一鼓殲除之策不得任其蔓延恩合出省以後寶珣尙未交卸仍當與富平阿加意防範不得存五日京兆之見是爲至要將此由五百里各諭令知之○諭李瀚章奏粵東逆股竄動見籌楚邊防剿情形一摺汪逆大股攻撲江西之定南龍南兩城經官軍擊敗後復退竄龍定之交勢將鋌而走險江閩粵兵力萃集該逆似不敢回向東竄惟慮逸入西路則陽山連州連山

及廣西邊境在在空虛恐致死灰復然仍成燎原之勢著李瀚章  
激勵邊防將士審機遮擊以挫賊鋒瑞麟郭嵩燾當飭水師將弁  
嚴扼北江一帶水道其韶河下游並著加意攔截嚴遏竄越張凱  
嵩尤須迅調勁兵將粵西邊境扼要防守毋令賊蹤竄入見在賊  
勢敗挫奔突靡常亟應乘勝剿滅如果賊向西趨劉坤一務當迅  
令席寶田一軍馳赴楚省併力會剿湖南備多力分實形單薄劉  
連捷朱洪章等軍如能赴楚追剿自可稍助兵力並著左宗棠劉  
坤一會商調派毋失機宜將此由六百里各諭令知之○諭廣鳳  
奎昌奏民勇收復奇台等處請飭催大兵進剿一摺奇台等城前  
被回匪攻陷經奇台縣知縣恆頤督率勇頭張和等節節西剿於  
七月初八等日疊次殲賊無數連克奇台古城濟木薩三城賊匪  
西遁洵屬奮勇出力深可嘉尚惟逆回猖獗異常民勇僅止數千

名自應添撥大軍以資攻剿前已疊諭聯捷等迅速出關諒可不日西征卽著訥爾濟飛速迎提奇台等處旣已克復則巴里坤防務稍鬆並著先就見有兵力妥籌進剿文麟有地方之責究在何處著傳諭該員奮勉圖功以贖前愆巴里坤餉需甚絀並著廣鳳等於各省解到餉內懷遵前旨酌量分撥其攻剿情形著隨時偵探具奏將此由五百里諭知廣鳳奎昌訥爾濟並傳諭文麟知之○湖南巡撫李瀚章奏黔匪竄偏涼傘雪洞等營見飭各軍援剿得旨卽著嚴飭周洪印督率各軍實力進剿痛殄逆氛以清邊境○曾國藩奏近日捻眾回竄荷澤曹定等處潘鼎新已至鉅野由徐州調往之色爾固善張樹珊馬步各軍均至濟甯正可會合進剿而該匪忽分支狂竄一支回竄徐州攻破銅山境內之辛家寨遷馬及於鄭家集距徐城僅六十里一支直趨濟甯之長溝勢將

渡運河而東據各路探報馬賊近萬步賊以六七萬計任柱牛洛紅賴汶洗李允陳大濟各酋俱已東來其西畱豫省者僅張總愚南陽一股人數較少力亦較弱是目下賊勢趨重東路不特秦晉暫可無患卽宛洛患亦稍輕自當以全力專顧東路徐州一支恐竄沂州海州而擾及裏下河長溝一支恐竄濟南泰安而擾及東三府見飭潘鼎新張樹珊兩軍防剿東北濟泰一路而調郭松林楊鼎勳兩軍防剿東南沂海一路此外則劉銘傳畱於周家口周盛波畱於歸德府斯六軍者皆淮勇最勁之兵所駐皆三省最要之地其防戍大江以南者僅有劉秉璋等三起分駐蘇松東壩等處萬不能再行調出諭旨飭李鴻章視師河洛該處見無可剿之賊淮勇亦別無可調之師至臣所部楚軍除酌畱劉松山等剿捻外餘皆全數遣撤臣今所倚以辦賊者全賴淮勇諸軍供其指麾



李鴻章若果入洛亦豈肯撤臣布置已定之兵挾以西行坐視山

東江蘇之糜爛而不顧是李鴻章之無兵帶赴西路時爲之也勢

爲之也臣屢接稟報閩軍黃少春等攻克鎮平江軍席寶田婁雲

慶等疊獲大捷髮逆勢甚窮蹙又有劉典康國器劉連捷周寬世

各軍星羅碁布似閩粵餘孽不久即可殲除諭旨令鮑超改赴河

南實屬於粵無損於豫有益惟餉項由楚省解濟未知能否無缺

臣擬商之李鴻章若能由江南協解數成則河南多一枝勁旅湖

北少一分供應似於大局稍有裨益又奏正封摺間據潘鼎新稟

稱捻逆由城武金鄉南趨豐碭等處據擒賊供稱該逆欲回雒河

老巢等語查賊蹤飄忽臣調諸軍甫集曹濟該逆忽擾及徐州徐

防兵力頗單祇堪堅守不能迎剿欲調馬步各隊回顧徐郡該逆

又將紛竄他處狡謀多端亟思疲我殊深焦灼又接李鴻章函稱

因奉馳赴河洛之旨欲畱楊鼎勳等二軍暫緩前進臣以沂海襄

下河一路尙無防兵仍當飛檄調來會剿徐境之賊又接劉銘傳

呈稱張總愚一股由南陽西南竄去已近鄂省邊境楚北防範甚

嚴似亦不足深慮均報聞○丙戌諭軍機大臣等官文等奏賊氛

南竄派兵夾擊一摺捻氛南竄擾及襄陽所屬之雙溝等處勢甚

蔓延官文等見飭姜玉順劉維楨等分路堵禦務當督率將士

等認真防剿兩面夾擊毋令竄擾完善之區至此股捻逆倡亂多

年蹂躪數省罪大惡極必應合三省之力殄此狂氛豈可輕率言

撫惟脅從之人情尙可憫果能捆獻逆首繳械投誠方可予以自

新之路該督撫等惟當激勵將士乘賊勢稍弱之際一鼓殄除不

可爲撫之一字所惑致墮狡計將此由六百里各諭令知之○左

宗棠徐宗幹奏高連陞等軍克復鎮平汪逆圖竄平遠八尺地方

適婁雲慶劉典等軍馳至遂折向大柘竄走後隊尙踞河頭鄉劉典所部副將張福齊等於八月十三夜分道疾進擒斬千餘名都司蕭雅泗等收降賊目偽朝將何人俠等六百餘人高連陞康國器等軍追剿敗賊至東石鄉楓葉坑等處斬馘五千名餘匪分竄黃陂墟羅浮司十四日高連陞等復追至黃陂墟之高坳斃匪約七八千人汪逆奪路狂竄乘夜向羅浮司遁去總兵劉清亮跟蹤追擊十六日殲斃後隊悍賊無多該逆狂奔赤石司前隊由間道出黃貝嶺竄至絲毛坪距江西長甯鵝公墟五十里十九日經已革總兵王開琳等前後夾擊賊大敗潰官軍沿途追殺數百名生擒長髮老賊三十餘名連日共計斃賊一萬數千名解散不計其數據獲賊供稱汪逆悍黨已殲除及半其偽東平王等及霆營叛勇黃矮子各股則已殲除逃散殆盡頃據各路稟報賊蹤已竄至

長甯交界之小山墟青龍墟洋坑一帶賊黨無多江軍席寶田婁雲慶兩軍已由平遠折回長甯王開琳周寬世兩軍分扼長甯之篁鄉堡鵝公墟等處賊如由此路竄江西則江軍截其前閩軍躡其後自可共收夾擊之效惟高連陞所部兵力尙單臣左宗棠已飭劉清亮康國器關鎮邦各軍統歸高連陞節制調遣由粵東躡蹤前進爲追剿之師劉典所部由江西會昌安遠信豐直趨南安黃少春一軍由平遠信豐繼進冀助江西之防而扼湖南之隘爲攔擊之師計兩路出境及先駐江境王開琳一軍已近三萬人福建得勝之軍除蘇軍八千遣回江蘇王德榜一軍回駐閩境外餘悉資遣以行矣臣宗棠俟各路軍事及轉運事宜布置就緒再還省署其王德榜一軍凱旋後應暫畱清泉一帶接剿餘匪以資鎮壓又奏正拜摺聞據延建邵道康國器稟報八月十四日康熊飛

吳光亮等隨同高連陞追賊至黃陂墟獲勝後十五日高連陞仍率隊先進康熊飛等繼之連發偵探不見一賊詢之士人僉稱賊眾連夜狂奔已至巖下相隔六十餘里康熊飛等急馳十餘里逆賊數千從兩邊山坳突出高連陞揮軍迎敵康熊飛等亦從後殺入斃賊多名汪逆復率黃衣紅衣悍賊層層偪裹都司關鎮邦匹馬直取汪逆胸受矛傷猶裹創力戰中槍殞命親兵從死者五十餘人各軍憤極康熊飛等大呼陷陣與高連陞併力衝殺縱橫決盪賊漸不支詎白水寨及沿途各土堡伏賊盡起土匪亦齊出助勢直鈔官軍之後康熊飛吳光亮等與高連陞四面攻擊傷賊甚多賊圍始解官軍乘勢殺出復整隊分投接戰土匪四散奔逃汪逆亦同時竄走據被擄逃出之勇丁聲稱十四日行抵黃陂墟隔大隊不過數里忽遇土匪將輜重軍火盡行搶去勇丁被害百餘

名高連陞營中落後勇夫概被戕害並訪悉汪逆自闌入粵境後黃陂墟羅岡白水寨一帶土匪皆與勾結汪逆因連日受挫恐不得脫以重金賂該處土匪先紿官軍入伏而後截奪輜重軍火十六日高連陞康熊飛仍整隊往追午刻馳抵羅浮賊已由羅浮過河折斷浮橋竄走查汪逆經官軍疊次剿敗其勢已窮詎又勾結土匪乘官軍遠道窮追潛行設伏致有此挫見據探報賊已盡入江西邊境兇倖復張康國器一軍暫回興甯高連陞劉清亮兩軍仍跟蹤追剿所望江西各軍能竭力堵遏不任闌入或尙可收夾之效並請飭下廣東撫臣嚴辦土匪以弭後釁力戰陣亡之擬

將都司關鎮邦等相應開列請旨飭部分別從優議卹上

諭前據劉坤一瑞麟等各奏稱賊已由江西竄出定南一路直撲龍南已疊諭左宗棠盡力窮追並令廣東江西等省各督撫會剿

堵截著左宗棠仍遵前旨嚴檄各省之軍實力追擊瑞麟劉坤一  
郭嵩燾分路堵截毋任紛竄至汪逆由鎮平逃出勢本窮蹙不難  
立時殄盡乃該處土匪竟敢貪受汪逆金帛暗伏要路於高連陞  
等追至黃陂墟時突出橫截奪去輜重軍火並將兵勇戕害甚多  
帶勇員弁被戕甚眾以致汪逆得以從容遁去此等土匪名爲鄉  
團實與叛賊無異可恨已極若不趕緊剿滅勢必又釀成巨股瑞  
麟郭嵩燾責無旁貸著迅派兵勇將此起土匪會同閩軍實力剿  
洗務須掃除淨盡不准一名漏網以儆兇頑其方耀殘殺張運蘭  
所部湘勇二百餘名及高連陞黃少春所部勇丁在粵被戕並左  
宗棠差兵齎往銀牌等件赴粵被該處團練搶殺各案均著瑞麟  
郭嵩燾卽行捕獲賊犯正法毋稍寬縱將此由六百里各諭令知  
之○丁亥 上奉 慈安皇太后 慈禧皇太后還宮○戊子恭

奉 文宗顯皇帝 孝德顯皇后升祔 太廟翌日頒詔天下覃

恩有差○予恭奉 神牌黃輿還京之王大臣暨護送員弁各一

級兵丁半月錢糧賞沿途恭請 神牌黃輿校尉銀○諭軍機大

臣等都興阿等奏督兵進剿甯南獲勝見在籌辦情形一摺此次  
官軍深入八九十里雖殺賊不多賊情地勢大略探明該逆馬隊  
尙多見有北竄磴口寶豐之信都興阿等已派遊擊徐祥林等帶  
隊赴磴口駐守令侍衛訥依楞阿等駐寶豐令協領音德善等赴  
平羅會同在城文武防範所籌均尙周妥著卽嚴檄各員認真守  
禦遇賊卽擊毋稍鬆懈賊數旣屬不多而賊糧又復甚缺該將軍  
等務當審度賊情相機進剿如將附近援賊各圩漸次廓清城賊  
之勢益孤得手自易甯夏一城日久未復師老兵疲殊出意外該  
將軍等惟須加意激勵將士以期一鼓成功用副委任花馬池等



處地方防務嚴飭翁同書等認真防維毋稍大意磴口一帶係東  
竄歸綏大道都興阿雖已派兵駐守誠恐繞越晉疆又成滋蔓著  
德勒克多爾濟桂成王榕吉督飭在防兵弁設險固守不准有一  
賊入境如需添兵防守亦須豫爲籌畫以期有備無患另片奏穆  
圖善所部陳東霖楚勇二營應需協餉請仍飭山西速解等語陳  
東霖兩營月餉爲數無多該營抵甘已逾五月再不趕緊解濟深  
恐飢寒交迫激而生變著王榕吉於該省無論何款迅速按月補  
解毋再遲延干咎將此由六百里諭知都興阿穆圖善德勒克多  
爾濟桂成並傳諭王榕吉知之○駐藏大臣滿慶等奏遵陳調派  
土兵防範披楞得旨所陳防範披楞及暗助布魯克巴各節尙爲  
妥協著卽隨時咨令達賴喇嘛飭令派出土兵及帶兵番員扼要  
嚴防認真操練以備不虞○己丑諭軍機大臣等楊能格奏續陳

固原前敵各營潰變情形各摺片所陳雷正綰各營因乏糧潰變該提督要之以死跟蹤追阻百計拊循始於平涼紮定復據周顯承函稱雷正綰於初七日親帶親兵馬隊由涇州追剿北竄李家堡之賊刻下駐紮平涼各營又移紮四十里鋪等語是該提督爲人所制尙思剿賊自效重整軍威力圖再舉該提督白金積堡之敗朝廷撤其幫辦稍示薄懲仍畱提督本任並令剿賊立功原因雷正綰入甘以來克復城寨多處頗著戰功並非卽于廢棄卽此次各軍潰亂該提督本有應得之咎而稟報訛傳更謂該提督有意爲之朝廷斷不能信雷正綰當如何感激圖報力洗前愆見在甘省回務鳴張各營潰卒紛紛思逞胡大貴等膽敢乘機生變降回赫明堂又復意存觀望正雷正綰努力自效之時豈得以幫辦既撤遂思一死塞責該提督見畱固原提督本有奏事之責此事

即可據實入告何至函致他人求爲剖白嗣後雷正綰遇有軍務緊要事件卽著專摺馳奏卽見在收撫潰卒情形亦著據實入告並將所部各營重加整飭迅將胡大貴李高啟雷恒叛弁設法擒斬赫明堂等首鼠兩端如果生心煽惑亦當設法誅鋤其周顯承所招該提督舊部卽著併歸前敵統交雷正綰調遣仍不得與周顯承互相牴牾楊能格前請令魏添應接統該提督所部之處卽著毋庸置議該提督糧餉兩缺撫馭艱難卽著楊岳斌劉蓉趙長齡楊能格迅籌餉糈徑解涇州糧臺轉運雷正綰行營以應急需毋令再有缺乏至各營潰卒人數眾多誠恐乘隙紛竄胡大貴等自知罪不容誅難保不糾黨潛逃並著楊岳斌德興阿等調派各軍嚴密勦捕盡法懲辦陝西沿邊各隘劉蓉等務當飭令在防將士實力堵遏毋稍疏虞將此由六百里諭知楊岳斌德興阿趙長

齡劉蓉並傳諭雷正綰楊能格知之○庚寅歲內閣前因劉蓉奏  
參陶茂林貪污不法各情並陶茂林營勇潰散情形疊經降旨交  
楊岳斌確查具奏茲據奏稱該營所欠口糧實由餉絀所致軍士  
因索餉所得無多藉詞侵蝕相率譁散該提督經過地方收受陋  
規州縣官往往執贄門下其心迹貪污已可概見至收納回女一  
節該營女眷甚多是同是漢實難明悉惟該提督於上年赴援靖  
遠一聞眷屬行抵蘭州輒自徑回省垣至本年正月始行出省該  
營勇丁紮營地方搶掠淫虐不堪言狀各等語陶茂林以專閫大  
員輒敢廢法營私以致所部兵勇到處滋擾始而潰逃繼以挫敗  
實屬咎無可辭著卽革職以示懲儆另片奏陶營勇丁往援靖遠  
道經貢馬井剝取紳民衣服搶掠婦女並熏死山洞居民各等語  
勇丁肆擾害民更甚於賊該管官等毫無防範殊堪髮指記名總

兵借補涼州鎮標左營遊擊李邦英記名總兵借補西甯鎮標中營遊擊陶生林儘先副將借補瑪納斯協標左營都司鄧洪池儘先參將班樹傑副將銜卽補參將李春海儘先副將借補肅州鎮屬高台營都司陳正榮均著先行革職交楊岳斌嚴行審辦俟訊明後再行分別參奏請旨○諭前據都興阿奏參署甘肅臬司楊柄鋳署總兵穆隆阿辦理撫局不實當經降旨交楊岳斌查明具奏茲據該督奏稱楊柄鋳等辦理招撫事宜雖因兵單餉絀惟未能妥籌善後以致固原州城復被賊陷實屬咎有應得除楊柄鋳業經照部議降二級調用毋庸置議外穆隆阿著交部議處○左宗棠徐宗幹奏汪逆全股竄至小山墟青龍墟洋坑等處分股擾及瑤田距鵝公墟十餘里仍圖由長甯竄江西八月二十一日經王開琳在瑤田擊敗賊知北路不能偷越急欲改道向天花寺旁

竄二十二日王開琳率隊由瑤田進剿賊於嶺路險窄處橫築兩卡以阻官軍王開氣熊常富奮勇當先突入前卡立斬守賊十餘名餘賊驚潰官軍追過烏龍寨賊又砌石卡一座王開琳飭所部三路環擊立將石卡平毀賊眾六七千人排列山岡及田隴一帶蠶擁而來王開琳督各營分路齊進該逆拌死猛撲鏖戰兩時陣斬悍賊五六百名官軍乘勢追至青龍墟伏賊由兩邊山谷中突出敗賊亦折回死拒適鄧仕高等由右路鈔至該逆猝不及防紛紛潰走墜崖死者無數王開氣等由中路追殺亦斃賊千餘名忽小山墟出賊來援方有才督隊力戰王開琳率親兵從後策應羅瑞山等左右兜剿立將後股援賊擊敗追過小山墟里許始行收隊計是役斃賊約數千名生擒七八百名餘逆悉向天花寺一路逃竄是夜王開琳率隊急追行抵白水渡沿途疊有斬殺復馳十

餘里追及賊之尾隊該逆尙於田隴列隊回撲王開琳飭各營分  
路縱擊斬馘千餘追至下歷司羣賊翻山越嶺而遁查汪逆本謀  
竄江因平遠未能竄越遂圖竄長甯茲聞席寶田婁雲慶兩軍已  
折赴南安如能扼其奔衝賊必伺隙橫出圖擾江粵湘三省邊境  
劉典一軍臣飭其由安遠信豐前進本擬爲攔頭之師詎劉典甫  
抵會昌賊蹤已入龍南刻下局勢惟望江粵各軍能分守邊隘截  
賊出路俟劉典黃少春等由南安趕到或可收夾擊之效其高連  
陞康國器兩軍自鎮平克復後窮追六晝夜未稍停趾正期得手  
爲土匪所紿深入伏中輟重軍火又爲土匪截搶淨盡停追一二  
日賊蹤業已遠颺不能追及矣如賊爲南安官軍所扼折竄南雄  
自當迅速馳剿就閩軍而論賊在江西湖南邊境當責令劉典黃  
少春兩軍會合江楚防軍夾擊賊竄粵東當責令高連陞劉清亮

康國器等軍會合粵軍夾擊惟當竭力以圖相機進取此次剿賊出力之已革總兵王開琳可否請旨開復革職處分已革參將熊常富可否免其拏問軍功鄧仕高可否以守備補用並加都司銜以示鼓勵又奏鎮平克復汪逆已竄江西粵境業已無賊臣自毋庸入粵調遣各軍以見在局勢而言南安有江軍攔頭席寶田襲雲慶王開琳三軍躡擊劉典一軍復從會昌安遠信豐以向南安而扼湖南桂陽邊隘似大局尚可收夾擊之效然山路處處可通終慮逆賊乘虛突竄官軍皆成尾追之局刻下賊竄江西意圖別覓生路其勢必於江粵湘三省邊界奪路狂奔臣所部各軍均已分道入粵入江其駐漳州者僅祇親兵八百人去賊已千數百里勢不相及文報往還徒滋曠誤兵機最忌遙制臣非敢有意推諉伏懇收回節制三省各軍成命俾各將領得免觀望遷延實於大



局有益又奏據高連陞稟報八月十五日馳赴羅岡督軍先進康熊飛繼之沿途詢之士民均稱賊已連夜竄走六十里不在羅浮司而羅岡去羅浮司尚有四十餘里嶺谷深幽樹木叢雜官軍行二十餘里見山徑愈窄疑其有伏詢之士人猶以賊蹤去遠爲辭比高連陞派弁勇數十人搜山而進瞥見兩邊山坳伏賊突起卽飭張志公曹先德上山搜殺甫將伏賊擊退汪逆又親率悍黨數千撲來敗賊亦卽回駐高連陞飭錢桂仁所部突前衝殺自督親兵策應逆賊愈褻愈厚官軍猛戰斃賊甚多賊勢稍卻適康熊飛督隊馳至止欲乘勢痛剿詎白水寨及沿途各土堡伏賊盡起從後鈔來高連陞以地勢險窄不能展布遂與康熊飛等將前後隊互易且戰且退殺透重圍至地勢稍寬之處排齊隊伍分路向前衝擊該處土匪復糾聚一二萬人四面撲來沿途從逆各土堡亦

助施槍礮高連陞與康熊飛等分投迎敵血戰兩時將汪逆擊敗土匪四散奔逃始收隊回至羅岡該處土匪又出攔路搶殺弁員多傷斃者先是十四日高連陞追賊過大柘石正黃陂墟等處輜重軍火在後相距十餘里被該處匪徒將弁勇盡行殺害輜重軍火搶劫一空高連陞急飭參將鄒朝瑞等馳往查探甫抵黃陂墟復被土匪戕殺羅岡白水寨一帶匪徒又與賊通阻截官軍高連陞等急於追賊未暇過問十六日仍與康熊飛督隊追剿馳抵羅浮司賊早已連夜遁去復追二十餘里至樟樹坪河邊浮橋被賊折斷欲渡無舟高連陞率隊回至羅浮該處土民又復閉糴後路土匪充塞軍火糧餉不能轉運不得已回馳興甯縣城查高連陞一軍被土匪戕害竟至三百餘名之多昨已請旨飭下廣東督撫臣嚴辦土匪合再據實陳明此次力戰陣亡之參將王得盛等相

應開列請旨飭部照陣亡例從優議卹 上諭軍機大臣等賊由粵境竄擾江西定南龍南之交其勢甚張疊經諭令左宗棠瑞麟郭嵩燾劉坤一等派兵會剿並令李瀚章嚴防楚境茲據左宗棠奏逆氛已竄江西勢將於江粵湘三省邊界奪路狂奔該督見駐潭州去賊甚遠兵機最忌遙制請收回節制三省各軍成命等語賊蹤雖距閩粵較遠左宗棠即可不必入粵惟各路將領必有威望重臣節制調度方足以一事權不至各懷觀望致誤事機左宗棠惟當視賊所前往江西居中調撥相機剿辦以期迅殄狂氛俟此股賊匪殄滅淨盡方能卸此重任此次所請收回成命之處著毋庸議其八月二十一日寄諭命查之件仍著左宗棠迅速查辦據以覆奏劉坤一當飭席寶田等軍乘勝剿瑞麟郭嵩燾懷遵疊次諭旨督率粵軍跟蹤夾擊儻任令該將領等遲延觀望縱

賊不勦必惟該督撫等是問李瀚章仍遵前旨督飭防邊各軍實力扼截不得任賊竄突高連陞等軍奮勇追賊爲粵東土匪截殺戕害竟至三百餘名之多實屬形同叛逆著瑞麟郭嵩燾懍遵前旨趕緊嚴拏盡法懲治嘉應一帶徧地土匪尤應捕治淨盡不可稍涉姑容敷衍了事貽後日無窮之患左宗棠片著鈔給瑞麟等閱看將此由六百里各諭令知之○諭楊岳斌奏接准雷正綰咨稱該營兵潰情形一摺與劉蓉楊能格節次所奏情形相同雷正綰入甘以來頗著戰功此次該軍潰亂該提督以死自誓將所集各勇力圖整頓是該提督心迹已明即可毋庸置議昨已諭令將所部各營重加整頓並准其遇有緊要軍務專摺馳奏著楊岳斌仍遵前旨傳知該提督感激圖報簡練精銳相機勦賊以贖前愆胡大貴等乘機倡亂罪大惡極前已降旨革職緝拏正法其劉車

龍一員前據劉蓉奏稱在涇州守禦出力已照請開復參將茲據楊岳斌奏稱劉車龍擅棄韋州並因雷正綰被議亂造謠言與劉蓉所奏情節不符仍著楊岳斌詳悉查明分別辦理各處回匪近日剿辦若何該督仍當統籌大局妥爲布置務臻周密以期次第廓清用副委任將此由六百里諭令知之○以奕慶爲內閣學士由太常寺卿遷○予廣東陣亡參將王得盛甘肅殉難教諭王汝揆等祭葬世職○賞普濟堂功德林賑米三百石○辛卯以孟冬時享太廟 上前期親詣行禮○予直隸殉難典史石鳳洲祭葬世職○是月蠲緩河南鄧州等十八州縣山東濟甯等二十八州縣東昌等三衛被災被擾新舊額賦